

МОНГОЛБАНКНЫ ЕРӨНХИЙЛӨГЧ, САНХҮҮГИЙН ЗОХИЦУУЛАХ ХОРООНЫ
ДАРГА, САНГИЙН САЙД, ХАДГАЛАМЖИЙН ДААТГАЛЫН
КОРПОРАЦИЙН ГҮЙЦЭТГЭХ ЗАХИРЛЫН ХАМТАРСАН ТУШААЛ

2018 оны 12 сарын 28-ний өдөр

Дугаар А-342/659/310/74 Улаанбаатар хот

Дүрэм батлах тухай

Төв банк /Монголбанк/-ны тухай хуулийн 27² зүйлийн 4 дэх хэсэг, 28 дугаар зүйлийн 1 дэх хэсгийн 1 дэх заалт, Санхүүгийн зохицуулах хорооны эрх зүйн байдлын тухай хуулийн 16 дугаар зүйлийн 1 дэх хэсгийн 5 дахь заалт, Монгол Улсын Засгийн газрын тухай хуулийн 24 дүгээр зүйлийн 2 дахь хэсгийг тус тус үндэслэн ТУШААХ нь:

Нэг. “Санхүүгийн тогтвортой байдлын зөвлөлийн ажиллах дүрэм”-ийг хавсралтаар баталсугай.

Хоёр. Энэхүү тушаал батлагдсантай холбогдуулж Монголбанкны Ерөнхийлөгч, Санхүүгийн зохицуулах хорооны дарга, Сангийн сайдын 2010 оны 05 дугаар сарын 04-ний өдрийн 266/97/62 тоот хамтарсан тушаалын 1, 2 дугаар заалтуудыг хүчингүйд тооцсугай.

Гурав. Энэхүү тушаалын хэрэгжилтэд хяналт тавьж ажиллахыг Монголбанкны Дотоод аудитын газар (Т.Амарсайхан), Сангийн яамны Санхүүгийн хяналт, эрсдэлийн удирдлагын газар (Б.Доржсэмбэд), Санхүүгийн зохицуулах хорооны Дотоод хяналтын хэлтэс (Н.Нямдаваа), Хадгаламжийн даатгалын корпорацийн Дэд захирал (С.Дамдиндорж)-д тус тус даалгасугай.


МОНГОЛБАНКНЫ
ЕРӨНХИЙЛӨГЧ


Н.БАЯРТСАЙХАН


САНХҮҮГИЙН
ЗОХИЦУУЛАХ
ХОРООНЫ ДАРГА


С.ДАВААСҮРЭН

САНГИЙН САЙД


Ч.ХҮРЭЛБААТАР

ХАДГАЛАМЖИЙН
ДААТГАЛЫН
КОРПОРАЦИЙН
ГҮЙЦЭТГЭХ ЗАХИРАЛ


Х.БУМ-ЭРДЭНЭ

Монголбанкны Ерөнхийлөгч, Санхүүгийн зохицуулах хорооны дарга, Сангийн сайд, Хадгаламжийн даатгалын корпорацийн гүйцэтгэх захирлын 201... оны ... сарын ... -ны өдрийн дугаар А-372/659/310/77 хамтарсан тушаалын хавсралт

САНХҮҮГИЙН ТОГТВОРТОЙ БАЙДЛЫН ЗӨВЛӨЛИЙН АЖИЛЛАХ ДҮРЭМ

НЭГ. Нийтлэг үндэслэл

1.1 Монголбанк, Санхүүгийн зохицуулах хороо, Сангийн яам, Хадгаламжийн даатгалын корпораци хамтран байгуулсан Санхүүгийн тогтвортой байдлын зөвлөл /цаашид Зөвлөл гэх/-ийн бүтэц, зохион байгуулалт, санхүүгийн тогтвортой байдлыг хангах чиглэлээр талуудын оролцоо, эрх үүргийг тодорхойлж, ажлын уялдаа холбоог тогтооход энэхүү дүрмийн зорилго оршино.

1.2 Зөвлөл энэ дүрмийн 2.1-д заасан зорилго, санхүүгийн салбарын холбогдох Монгол Улсын хууль, түүнд нийцүүлэн гаргасан хууль тогтоомж, талуудын хооронд байгуулсан харилцан ойлголцлын санамж бичгийн хүрээнд чиг үүргээ хэрэгжүүлнэ.

ХОЁР. Зөвлөлийн зорилго, үйл ажиллагааны зарчим

2.1 Санхүүгийн тогтолцооны тогтвортой байдлыг хангахтай холбоотойгоор тогтолцооны шинжтэй эрсдэлийг илрүүлэх, хянах, бууруулах, санхүүгийн хямралаас урьдчилан сэргийлэх талаар хэлэлцэж, гишүүн байгууллагуудын үйл ажиллагааг уялдуулахад Зөвлөлийн гол зорилго оршино.

2.2 Монголбанк, Санхүүгийн зохицуулах хороо, Сангийн яам, Хадгаламжийн даатгалын корпораци /цаашид Талууд/-ийн байгуулсан Зөвлөл үйл ажиллагаагаа дараах зарчмын дагуу хэрэгжүүлнэ:

2.2.1 Талуудын харилцан хүлээх үүрэг тодорхой, ил тод байх;

2.2.2 Талуудын чиг үүргийн давхардлыг бий болгохоос сэргийлэх;

2.2.3 Зөвлөлийн хамтарсан шийдвэрийн дагуу талууд чиг үүргээ хэрэгжүүлэхдээ тус тусын үйл ажиллагаанд оролцохгүй, хууль бусаар нөлөөлөхгүй байх;

2.2.4 Мэдээллийг харилцан байнга шуурхай солилцох.

ГУРАВ: Зөвлөлийн эрх, үүрэг

3.1 Зөвлөл нь Монголбанкны Ерөнхийлөгч, Санхүүгийн зохицуулах хорооны дарга, Сангийн сайд, Хадгаламжийн даатгалын корпорацийн гүйцэтгэх захирлаас бүрдэнэ.

3.2 Зөвлөл нь энэ дүрмийн 2.1-д заасан зорилгыг хэрэгжүүлэхдээ дараах эрх, үүргийг хэрэгжүүлнэ:

3.2.1 Монгол Улсын санхүүгийн тогтолцооны тогтвортой байдлыг хангах, түүнд сөргөөр нөлөөлж болзошгүй нөхцөл байдал үүссэн тохиолдолд дүн шинжилгээ хийж, түүнийг арилгах талаар Талуудаас авч хэрэгжүүлэх үйл ажиллагааг уялдуулан зохицуулах;

3.2.2 Санхүүгийн асуудлаар зөвлөмж, дүгнэлт, шийдвэр гаргаж Улсын Их Хурал, олон нийтэд мэдээлэх;

3.2.3 Талуудаас санхүүгийн тогтвортой байдлыг хангах зорилгоор холбогдох хууль тогтоомжид тусгуулахаар төлөвлөж буй санхүүгийн тогтвортой байдлыг хангах бодлого, зохицуулалтыг хэлэлцэж, тохиролцох;

3.2.4 Санхүүгийн салбарын бодлого, зохицуулалтын өөрчлөлт нь улс орны санхүүгийн тогтвортой байдалд хэрхэн нөлөөлж буйд судалгаа хийж, шаардлагатай тохиолдолд Талуудаас хамтран авч хэрэгжүүлэх арга хэмжээг хэлэлцэж шийдвэрлэх;

3.2.5 Санхүүгийн тогтвортой байдлыг хангах, эдийн засгийн өсөлтийг сэргээж, тогтворжуулахад чиглэсэн мөнгөний бодлогыг төсвийн бодлоготой уялдуулах асуудлаар холбогдох байгууллагад зөвлөмж гаргах;

3.2.6 Монголбанк, Санхүүгийн зохицуулах хороо, Сангийн яам, Хадгаламжийн даатгалын корпорацийн харилцан ойлголцлын санамж бичгийн хэрэгжилтэд хяналт тавьж, санамж бичгээр Талуудын хүлээсэн эрх үүргийг хэрэгжүүлэхэд үүсч буй тулгамдсан асуудлыг хэлэлцэж шийдвэрлэх, санамж бичигт нэмэлт, өөрчлөлт оруулах;

3.2.7 Санхүүгийн тогтвортой байдлыг хангах талаар гадаад орнуудын авч хэрэгжүүлж буй арга хэмжээ, сайн туршлагыг судалж, өөрийн орны санхүүгийн салбарт нэвтрүүлэх санал боловсруулж шийдвэрлэх;

3.2.8 Монголбанк болон Санхүүгийн зохицуулах хорооноос хамтарч эрсдэл учирсан болон учирч болзошгүй санхүүгийн нэгдэлд шаардлагатай гэж үзвэл нэгдсэн хяналт шалгалт хийж, дүнг Зөвлөлд танилцуулж түүнтэй холбоотой Талуудаас авч хэрэгжүүлэх арга хэмжээг хэлэлцэж шийдвэрлэх;

3.2.9 Хямралын үед санхүү, эдийн засгийн тогтвортой байдал болон төсөв, мөнгөний бодлого, макро зохистой бодлогын уялдааг хангах талаар эрх бүхий байгууллагуудаас авч хэрэгжүүлэх арга хэмжээг уялдуулах;

ДӨРӨВ. Зөвлөлийн хуралдаан ба хуралдааны дэг

4.1 Зөвлөлийн хуралдаан нь ээлжит болон ээлжит бус байна. Ээлжит хуралдаан улиралд нэгээс доошгүй удаа хуралдах бөгөөд ээлжит бус хуралдааныг аль ч Талын санаачилгаар хуралдуулж болно.

4.2 Жил бүрийн 4 дүгээр улирлын Зөвлөлийн ээлжит хуралдаанаар дараа жилийн ээлжит хуралдааны товыг хэлэлцэж, тогтооно.

4.3 Гэнэтийн шалтгааны улмаас ээлжит хуралдааныг товлосон хугацаанд хуралдуулах боломжгүй болсон тохиолдолд хуралдааны товыг хойшлуулах эсвэл Талууд хуралдаанаар хэлэлцүүлэх, шийдвэрлүүлэхээр төлөвлөсөн асуудлуудаа Зөвлөлийн Ажлын албаар дамжуулан ажлын журмаар Зөвлөлийн гишүүдэд танилцуулж, шийдвэрлүүлж болно. Ажлын журмаар танилцуулж, шийдвэрлүүлсэн тохиолдолд ээлжит хуралдааныг зохион байгуулсанд тооцно.

4.4 Зөвлөлийн ээлжит хуралдааныг Монголбанкны Ерөнхийлөгч, Санхүүгийн зохицуулах хорооны дарга, Сангийн сайд, Хадгаламжийн даатгалын корпорацийн гүйцэтгэх захирал гэсэн дарааллаар хуралдаан хуралдаанаар ээлжилж даргална.

4.5 Ээлжит бус хуралдааныг санаачилсан тал зохион байгуулж, хурлыг даргална.

4.6 Зөвлөлийн гишүүд бүгд оролцсоноор хуралдаан хүчин төгөлдөр болно.

4.7 Зөвлөлийн хуралдаанд Зөвлөлийн гишүүд, Зохицуулагчид, асуудал хариуцсан мэргэжилтэн, Зөвлөлийн Ажлын албаны дарга байнга оролцоно.

4.8 Зөвлөлийн хуралдааны шийдвэр Зөвлөлийн гишүүдийн 100 хувийн саналаар хүчин төгөлдөр болно.

4.9 Зөвлөл нь хэвлэмэл хуудастай байна.

4.10 Санхүүгийн тогтвортой байдлын зөвлөлийн шийдвэрийг Талууд хуулиар олгогдсон бүрэн эрхийнхээ хүрээнд тогтоол, тушаал гарган баталгаажуулж, хэрэгжүүлнэ.

4.11 Зөвлөлийн гишүүд өөрийн харьяалал болон зохицуулалтын хүрээний асуудлаар Зөвлөлийн хуралдаанаар хэлэлцэх асуудлын бэлтгэлийг хангах, Зөвлөлөөс баталсан шийдвэрийн биелэлтийг хариуцна.

4.12 Зөвлөлийн хуралдааны тэмдэглэлийг Ажлын албанаас хөтөлж, Албаны дарга гарын үсэг зурж баталгаажуулна. Тэмдэглэлд хэлэлцсэн асуудлын жагсаалт, холбогдох материалыг хавсаргасан байна.

4.13 Ажлын алба нь Зөвлөлийн хуралдааны даргын тогтоосон Зөвлөлийн хуралдааны товыг Зөвлөл хуралдахаас ажлын 2 өдрийн өмнө Талуудад мэдэгдэж, хурлын материалыг урьдчилан тараасан байна.

4.14 Зөвлөлийн хуралдаанаар хэлэлцэх асуудлыг бэлтгэн оруулж буй Тал дараах материалыг Ажлын албанд хуралдаан болохоос ажлын 4 өдрийн өмнө хүргүүлсэн байна:

4.14.1 Хэлэлцэх асуудлын товч танилцуулга;

4.14.2 Хэлэлцэх асуудлаас үүсч болох үр дүнгийн талаарх үнэлэлт, дүгнэлт;

4.14.3 Хэлэлцэх асуудлын талаар авч хэрэгжүүлэх арга хэмжээний танилцуулга.

4.14.4 Хэлэлцэх асуудлын талаар гарах шийдвэрийн төсөл;

ТАВ. Ажлын албаны бүтэц, зохион байгуулалт

5.1 Зөвлөлийн ажлын албаны үүргийг Монголбанк хэрэгжүүлнэ. Ажлын албаны бүтэц, орон тоог Монголбанк тогтооно. Ажлын албаны дарга нь Зөвлөлийн өмнө нарийн бичгийн даргын үүргийг мөн гүйцэтгэнэ.

5.2 Ажлын алба Монголбанкны байранд байнгын үйл ажиллагаагаа явуулна.

5.3 Талуудын саналыг авсны үндсэн дээр Ажлын албаны даргыг Монголбанк томилох бөгөөд тэрээр дараах эрх үүргийг хэрэгжүүлнэ:

5.3.1 Зөвлөлийн ээлжит болон ээлжит бус хуралдааны бэлтгэл ажлыг хангах, зохион байгуулах;

5.3.2 Санхүүгийн тогтвортой байдлын мэдээ мэдээллийг олон нийтэд мэдээлэх, хэвлэлийн бага хурал зохион байгуулах;

5.3.3 Зөвлөлийн хуралдаанаас гаргасан шийдвэрийн дагуу өгсөн бусад үүрэг, даалгаврыг биелүүлэх;

5.3.4 Шаардлагатай гэж үзвэл тухайн салбараар мэргэшсэн зөвлөх, эрдэмтэн судлаачдыг авч ажиллуулж болно.

5.4 Зөвлөлийн гишүүд Зөвлөлөөс гаргасан шийдвэрийн биелэлтийг хариуцан зохицуулах чиг үүргийг хэрэгжүүлэх газрын дарга/орлогч (Монголбанкны хувьд газар/хэлтсийн захирал)-оос доошгүй нэг албан тушаалтныг Зөвлөлийн ажлын албаны Зохицуулагчаар тус тус томилно.

5.5 Зохицуулагчид Зөвлөлийн ажлын албанаас өгсөн үүрэг, даалгаврыг өөрийн үндсэн ажил үүрэгтэйгээ хавсран гүйцэтгэх бөгөөд тэр нь орон тооны бус байна.

5.6 Зохицуулагчийн ажил хавсран гүйцэтгэсний нэмэгдэл цалин хөлс, урамшуулал ба түүнтэй холбоотой хөдөлмөрийн эрх зүйн асуудлыг тухайн Зохицуулагчийг томилсон Зөвлөлийн гишүүн хариуцна.

5.7 Зохицуулагчид ажлын албаны даргаас өгсөн чиглэлийн дагуу дараах эрх үүргийг хэрэгжүүлнэ:

5.7.1 Зөвлөлийн хуралдаанд шаардлагатай бол оролцох, түүний бэлтгэл ажлыг хангах;

5.7.2 Зөвлөлийн хуралдаан болон түүний үйл ажиллагаатай холбогдох баримт бичгийг боловсруулах, нэгтгэх, хадгалах;

5.7.3 Ажлын албаны даргад өөрийн байгууллагын зүгээс Зөвлөлийн хуралдаанд оруулах асуудал, холбогдох баримт бичгийг хүргүүлэх;

5.7.4 Зөвлөлийн хуралдаанаас гаргасан шийдвэрийг биелүүлэхэд шаардлагатай бусад арга хэмжээг Ажлын албанаас өгсөн чиглэлийн дагуу зохицуулах, зохион байгуулах.

